

Dodatak br. 1. Ugovora o obavljanju komunalnih djelatnosti između naručioca (Grad Zenica) i izvršioca (ALBA ZENICA d.o.o. Zenica) kojim se reguliraju ugovorene usluge.

Opći uvjeti obavljanja usluga

Član 1.

Komunalne usluge koje su regulirane Ugovorom o obavljanju komunalnih djelatnosti između naručioca i izvršioca su sljedeće:

- a) Prikupljanje, odvoz čvrstog komunalnog otpada i kabastog otpada iz stambenih objekata i poslovnih prostora na cijeloj teritoriji Grada na daljni tretman i deponiranje,
- b) Zimska služba na gradskim ulicama u skladu sa važećim propisima koji uređuju ovu oblast,
- c) Čišćenje i pranje gradskih ulica i drugih javnih saobraćajnih površina, zelenih površina i uređenih korita rijeka u užem gradskom području,
- d) Pražnjenje korpi za ručni otpad raspoređenih po gradu,
- e) Uklanjanje divljih deponija komunalnog otpada na cijeloj teritoriji Grada,
- f) Uređenje i održavanje zelenih površina, parkova i rekreacionih površina.

Član 2.

Usluge regulirane ovim dodatkom Ugovora se izvršavaju u skladu sa :

- Zakonom o komunalnim djelatnostima,
- Odlukom o komunalnom redu,
- Odlukom o komunalnim djelatnostima zajedničke potrošnje,
- Pravilnikom o upravljanju ambalažom i amblažnim otpadom,
- Pravilnik o upravljanju otpadom od električnih i elektronskih proizvoda,
- Zakonom o upravljanju otpadom FBiH.

A) Prikupljanje, odvoz čvrstog komunalnog otpada i kabastog otpada iz stambenih objekata i poslovnih prostora na cijeloj teritoriji Grada na daljni tretman i deponiranje

Član 3.

Pod prikupljanjem i odvozom komunalnog otpada se podrazumijeva odvoz otpada iz domaćinstva kao i drugog otpada koji je zbog svoje prirode ili sastava sličan otpadu iz domaćinstva, iz ustanova, od privrednih subjekata u gradu Zenica.



Sakupljanje otpada se vrši u namjenskim posudama, koje omogućavaju sigurno sakupljanje otpada. Posude posjeduju poklopac koji onemogućava rasprostiranje otpada oko posude, odnosno pristup životinjama (ptice, glodari, psi, mačke i sl.), isto tako posude onemogućavaju isticanje procjednih tečnosti iz otpada u okoliš.

Pražnjenje otpada iz posuda se u pravilu vrši u namjensko vozilo za odvoz koje sprečava rasipanje otpada odnosno otpadnih tečnosti iz posuda prilikom istresa i pri transportu do postrojenja za postupanje sa otpadom ili deponije za odlaganje.

Vozila za istresanje pri radu ne smiju proizvoditi buku veću od propisane za tu djelatnost.

Član 4.

Posebne kategorije otpada koje nastaju u domaćinstvima, a po svojim karakteristikama ili dimenzijama se ne sakupljaju u okviru organiziranog odvoza komunalnog otpada će biti predmet posebnog dogovora između naručioca i izvršioca.

U posebne vrste otpada spadaju:

- ambalažni otpad
- otpadna vozila
- otpadna ulja
- otpadne baterije i akumulatori
- otpadne gume
- električni i elektronički otpad
- otpad koji sadrži azbest
- otpad koji sadrži PCB
- otpad iz proizvodnje titanoksida
- medicinski otpad
- životinjski otpad
- građevinski otpad

Komunalni otpad isključuje sljedeće vrste otpada:

- otpad i zemlja iz vrtova,
- pepeo iz peći za grijanje ili pečenje,
- kabasti otpad (dimenzije veće od 0,5x0,5x0,1 m),
- posebne kategorije otpada.

Član 5.

Kabasti otpad iz domaćinstava se dva puta godišnje odvojeno sakuplja. O mjestu i vremenu sakupljanja ove vrste otpada se domaćinstva uključena u organizirani odvoz komunalnog otpada pravovremeno i na primjeren način informiraju. Odvoz se organizira namjenskim samoutovarajućim teretnim vozilima.

Član 6.

U skladu sa Zakonom o upravljanju otpadom Federacije BiH i u njemu navedenim prioritetima i osnovnim načelima planiranja i upravljanja otpadom ugovorne strane će u narednom periodu intenzivno raditi na:

- uspostavi sistema odvojenog sakupljanja iskoristivog dijela otpada na javnim mjestima (zeleni otoci),
- uspostavi odvojenog sakupljanja iskoristivog dijela otpada u privatnim kućama,
- uspostavi rada reciklažnog dvorišta (za posebne vrste otpada).

Pojedinačne ciljeve po vrstama iskoristivog otpada i načinu njihovog sakupljanja će se odrediti u okviru ciljeva reguliranih nacionalnom legislativom o otpadu, vodeći računa o održivosti sistema odvojenog sakupljanja otpada (odvojenih tokova otpada).

Član 7.

Izvršilac pravi plan odvoza uvažavajući broj posuda i učestalost njihovih pražnjenja za narednu godinu.

Član 8.

Izvršilac je odgovoran za:

- opremanje lokacija tehnički ispravnim posudama za odlaganje otpada,
- izvršavanje planskog odvoza otpada,
- uklanjanje otpada odloženog pokraj posuda, koji je nastao usljed prepunjenosti posuda za otpad,
- uklanjanje otpada koji nastane prilikom utovara otpada na vozilo za odvoz,
- postavljanje ispražnjenih posuda na predviđeno mjesto,
- transport otpada na deponiju.

Član 9.

Izvršilac može odbiti odvoz otpada iz posuda ukoliko se on razlikuje od navedenog otpada u članu 3. i obavezan je obavijestiti komunalnog inspektora.

B) Zimska služba na gradskim ulicama u skladu sa važećim propisima koji uređuju ovu oblast



Član 10.

Zimska služba podrazumijeva uklanjanje snijega i sprečavanje stvaranja leda na gradskim ulicama 24 sata neprekidno. Principi rada su sadržani u Programu rada zimske službe i reguliraju ulice i površine na kojima se pruža usluga zimske službe, vrijeme čišćenja, odnosno uklanjanja snijega ili leda. Program rada zimske službe se donosi u skladu sa važećim propisima za ovu oblast najkasnije do 15.10., odnosno 30 dana prije početka zimske službe za predmetnu zimsku sezonu.

Član 11.

Period pružanja usluge zimske službe je od 15.11. do 15.03. naredne godine.

Član 12.

Izvršilac ne jamči za održavanje površina koje zbog parkiranih ili odloženih vozila nisu dostupne za čišćenje.

Član 13.

Program rada zimske službe definira troškove izvođenja zimske službe.

Materijal za posipanje površina je uračunat u navedene iznose.

Otvorena kalkulacija je bazirana na iskustvenom prosječnom broju dana na uklanjanju snijega i leda, iskustvenom prosječnom broju dana sa intervencijom i ostalim danima dežurstva.

Za planirane dane dežurstva i intervencije u okviru zimske službe se planiraju poslovi na čišćenju i uklanjanju uticaja snježnih padavina i leda.

Poslovi uklanjanja nakupljene nečistoće u zimskom periodu su posebno obrađeni u dodatku koji se odnosi na usluge: "Čišćenje i pranje gradskih ulica i drugih javnih saobraćajnih površina, u užem gradskom području, zelenih površina i korita rijeka".

Član 14.

U slučaju objave stanja elementarnih nepogoda usljed zimskih dejstava koje prevazilaze uobičajene aktivnosti zimske službe po osnovu trajanja ili visine snijega, nastali troškovi se obračunavaju dodatno na osnovu stvarno nastalih troškova.

C) Čišćenje i pranje gradskih ulica i drugih javnih saobraćajnih površina, u užem gradskom području, zelenih površina i korita rijeka.

Član 15.

Pod čišćenjem saobraćajnih i drugih površina se podrazumijevaju poslovi:

- Ručnog čišćenja asfaltiranih, betoniranih ili popločanih površina, pri čemu se uklanja ručni otpad, lišće u jesen i drugi kruti predmeti; ova usluga se vrši u pravilu 12 mjeseci i podrazumijeva jedan prolaz, čišćenje ugovorene površine sa odvozom, način obračuna je m^2 ;
- Ručno metenje asfaltiranih, betoniranih ili popločanih površina, pri čemu se metlom uklanjaju i odvoze pijesak, šljunak, mali dijelovi od papira, plastike, metala, stakla, keramike ili višeslojnog materijala; ova usluga se vrši u pravilu 9 mjeseci i podrazumijeva jedan prolaz, metenje ugovorene površine, način obračuna je m^2 ;
- Mašinsko čišćenje asfaltiranih, betoniranih ili popločanih površina, pomoću specijalnih vozila – čistilica; ova usluga se vrši u pravilu 9 mjeseci i podrazumijeva jedan prolaz vozila, način obračuna je m^2 ;
- Mašinsko pranje asfaltiranih, betoniranih ili popločanih površina se vrši pomoću autocisterni pri čemu se mlazom vode pod pritiskom peru površine i uklanjaju nanosi sitnog materijala; ova usluga se vrši u pravilu 9 mjeseci i podrazumijeva jedan prolaz, pranje ugovorene površine, način obračuna je m^2 ;
- Prvo mašinsko pranje asfaltiranih, betoniranih ili popločanih površina nakon zimskog perioda se vrši pomoću autocisterni pri čemu se sa mlazom vode pod pritiskom peru površine i uklanjaju nanosi sitnog materijala; ova usluga se vrši u pravilu 2 mjeseci i podrazumijeva jedan prolaz, pranje ugovorene površine, način obračuna je m^2 ;
- Čišćenja zelenih površina se vrši ručno, pri čemu se uklanjaju i odvoze manji predmeti neorganskog porijekla (do 1200 cm^3), težine do 2 kg, koji se nalaze na zelenim površinama; ova usluga se vrši u pravilu 9 mjeseci i podrazumijeva jedan prolaz, ručno čišćenje ugovorene površine, način obračuna je m^2 ;
- Čišćenja korita rijeka, pri čemu se ručno uklanjaju i odvoze predmeti zatečeni u koritu rijeka Kočeva i Babina rijeka (isključuje kabasti otpad); ova usluga se vrši u pravilu 9 mjeseci i podrazumijeva jedan prolaz, ručno čišćenje ugovorene površine, način obračuna je po m' ;
- Čišćenja korita rijeka, pri čemu se ručno uklanja i odvozi posebna vrsta otpada (regulisano članom 4. Dodatka) koji se nalaze na obalo-utvrdama i koritu rijeka (Kočeva, Babina rijeka) van vode ili u plitkoj vodi; ova usluga se vrši u pravilu 9 mjeseci i podrazumijeva jedan prolaz, ručno/ mašinsko čišćenje ugovorene površine, način obračuna je m' ;
- Čišćenje korita rijeka u vodi 15 do 60 cm u cilju uklanjanja i odvoza komada otpada nanosenih vodenom strujom težine do 10 kg i dužine do 3 metra; ova usluga se vrši u pravilu 6 mjeseci i podrazumijeva jedan prolaz, ručno čišćenje ugovorene površine, u dubokim ribarskim čizmama i angažiranje dva zaposlenika zbog sigurnosnih razloga, način obračuna je m^2 ;
- Čišćenje obaloutvrda u cilju odstranjivanja i odvoza rastinja i korova se vrši dva puta godišnje; način obračuna je m^2 . Cijena u okviru usluge "čišćenje korita rijeka".

Član 16.



Usluge iz ovog dodatka se, u načelu, vrše od 15.03. do 15.11. odnosno u toku cijele godine koliko to dozvoljavaju vremenski uvjeti.

Član 17.

Izvršilac nije odgovoran za čišćenje površina koje su blokirane parkiranim automobilima. Kada naručilac omogući čišćenje dogovorenih površina, izvršilac je obavezan da očisti cijelu saobraćajnicu.

D) Pražnjenje korpi za ručni otpad raspoređenih po gradu

Član 18.

Pod pražnjenjem korpi za ručni otpad se podrazumijeva redovno održavanje ispravnosti i pranje istih dva puta u ugovorenom periodu, njihovo pražnjenje zajedno sa odvozom sakupljenog otpada.

E) Uklanjanje divljih deponija komunalnog otpada na cijeloj teritoriji Grada i odvoz otpada na deponiju

Član 19.

Pod uklanjanjem divlje deponije podrazumijeva se uklanjanje divljih deponija komunalnog otpada na području Grada Zenica, zajedno sa odvozom na deponiju.

Član 20.

Otpad koji je neodgovorno odložen u blizini kontejnerskog mjesta izvršilac je dužan ukloniti po nalogu naručioca.

Član 21.

Sedam dana prije izvršenja usluge uklanjanja divlje deponije naručilac informira izvršioca o mjestu i o veličini iste.



Član 22.

Naknada za usluge iz ovog dodatka se obračunava na osnovu stvarnih troškova.

F) Uređenje i održavanje zelenih površina, parkova i rekreacionih površina.

Član 23.

Pod uređenjem i održavanjem zelenih površina se podrazumijevaju svi radovi u cilju održavanja i uređenja zelenih površina, parkova i rekreacionih površina a u skladu sa katalogom poslova usvojenim između naručioca i izvršioca.

Član 24.

Većina usluga iz ovog dodatka se, u načelu, vrše u periodu od 15.03. do 15.11. dok se neke aktivnosti obavljaju tokom cijele godine (sječa i orezivanje stabala, iskop panjeva i dr.).

Član 25.

Do 31.05.2020. naručilac i izvršilac će raditi aktueliziranje površina na kojima se pruža usluga uređenja i održavanja zelenih površina.

Član 26.

Obim usluga u narednoj godini se definira u Godišnjem planu do 31.10. a razrađeni godišnji plan po kvartalima i mjesecima i konkretnim površinama na kojima se odrađuje pojedina usluga naručilac dostavlja u sklopu godišnjeg plana.

